

四庫全書

史部

欽定四庫全書

閩中理學淵源考卷五十四

廣平府知府李清馥撰

恭清陳時周先生茂烈學派

按白沙之學明代諸公共議之謂其近於禪學然其  
高風素節亦可追已時周先生師事白沙其省身克  
己之錄未知與師門宗旨如何攷之林公見素誌公  
墓曰隱衷粹行對天地而質鬼神其人品在黃憲管

寧之右當時莆中諸公推許亦無異詞其操履可想  
矣

恭清陳時周先生茂烈

陳茂烈字時周莆田人也先世瑞安人曾大父以軍功  
隸興化衛總旗於是遂為莆人茂烈方髫年繼父戎役  
厲志不與羣兒伍晝入署夜歸則讀書祖母憐其孱弱  
亟止之乃覆燈默誦不輟年十八慨然嘆曰善學聖人  
者莫如顏曾顏之克己曾之省身夫非學之法歟作省

克錄自考弘治九年第進士嘗使廣東一切餽贐悉卻之是時新會陳獻章以理學倡東南茂烈則往執弟子禮語累日獻章甚喜告以學須靜一於是退作靜思錄佩其言終身為吉安理官十餘年入為監察御史袍服樸素騎一牝馬身若無官顧獨繫風紀之重有尚書侶子受賂而崔志端者亦為尚書故道流也皆以內援蟠結不能去茂烈再劾侶罷之崔仍留茂烈意未得而會其母張年七十有七老矣遂疏乞終養去家居身自治

畦一奚奴拾薪服食麤糲夜卧不能具一帷短牀敝席  
漠如也太守以其作苦遣二力助之三日白守曰是使  
野人多事且濫口食也遣還茂烈雖不究於仕然故具  
經濟才其在吉安持大體開至誠迪以民彞上下信服  
有婦嫠家富族人利其貲誣婦且別適特為白之令終  
所至民有嫁妾者妾娠緣妻悍去之比生子歸承父業  
族羣爭不決乃驗以女兄特類爭者遂服時守張嚴鷲  
而茂烈以寬佐之當道或深文皆徐為申釋明允公恕

既去而有遺思力耕養母者若而歲銓部稔其行清苦  
奏改晉江教諭以資養辭既而守臣復上其孝行貧苦  
狀武宗嘉之詔視侍郎潘禮故事月給米三石茂烈復  
辭古人行傭負米皆以為親臣即貧應未至此且母年  
八十有六來日無多願以身力作報母艱勞不願當廩  
賜上不允間四歲母卒茂烈抱疾強起號泣寢地疾遂  
亟未幾亦卒所產惟一女以身後屬司寇林俊俊為治  
其喪立族子遠揚為後海內大夫士聞而傷之御史王

應鵬以狀聞謂茂烈廉如石守道而所養獨純孝如徐仲車而所處尤困天子悼焉詔所司表宅里曰孝廉仍恤其家茂烈嚮道甚蚤比聞新會之教契悟亦深安貧樂志泰然自足日坐斗室究極五經四書之旨以身體驗隨得隨錄嘗曰儒有向上工夫詩文特土苴耳嘗與友人論學書曰承示胡敬齋書日不釋手議論精切用心良苦假所修如之當於吾道中求之也恨生晚而未考其世焉至於論白沙一峰二先生與丘文莊張東白

頗有抑揚蓋一時之言而非蓋棺之論也文莊二公吾  
不及知一峰之志節尚矣白沙之學而疑其禪非真知  
白沙者也人一心也其用一耳士以記誦辭章競科名  
日趨於下矣向上將誰主耶世方以是相率任道者憂  
之故曰古人棄糟粕糟粕非真傳又曰莫笑世間無著  
述真儒不是鄭康成正懼其功倍於小學而妨此大道  
也白沙之初見康齋而歸也閉戶窮盡古今典籍又築  
臺靜坐不出閩外者數年深潛靜思真積力久心悟理



融而自得之妙非人所能知也敬齋亦學於康齋同門者也諒未及面而資麗澤之益又未知其發言之由無怪乎其作疑也自今攷之敬齋懼學者舍下學而躐於上達若白沙則懼學者逐口耳而忘乎身心也竊嘗細玩尊德性道問學一章學聖賢之法備矣然人之氣稟不一清者知之勝溥者行之勝無偏廢焉所入異而所造一矣安得起敬齋於九原相與細詳又曰萬物備於我反而求之於心身無限欠缺無限病痛至於中之欺

慊冷煖自知若夫愧影愧衾嚴切之功無踰於此烈雖  
鄙薄每自檢點勉循規矩今事至教先以治病為急若  
病去藥除則終身之訓也其持論如此林貞肅俊曰時  
周領悟既深而充養益熟隱衷粹行對天地而質鬼神  
第其人品當在黃憲管寧之右焉天啓辛酉謚恭清

越章

錄 莆陽文獻

教諭郭約之先生克一

郭克一字約之惠安人為入坦夷有志趣嘗講學於莆

以弟子禮見如賓陳先生先生語以為學當涵養本原  
不在枝葉繁辭克一深佩服之領正德癸酉鄉薦癸未  
試春官乙榜授歸善教諭歸善學在郭外殿宇敝壞諸  
生徒寄空籍於學分齋肄業之規弛甚克一慨然振而  
興之倡率諸尚義者鳩材募功重新學舍俾士有歸息  
而嚴立條教以約束之躬為講說經旨士心竦然諸司  
行部至惠州者莫不嘆賞居三年丁母憂歸卒於家

邑志

侍郎鄭山齋先生岳

鄭岳字汝華號山齋莆人南湖先生露之裔七歲而孤  
賴母林兄岵食貧而撫教之踰弱冠登弘治六年進士  
授刑部主事論囚東市錦衣千戶張福恃勢越坐岳奏  
論語涉中貴旨下詔獄堂官疏救得釋轉員外郎湖廣  
按察僉事宗藩侵民田累奏不決岳竟歸之民荆岳歲  
饑設法賑活甚衆常德守刑貨黷濫捕其左右置之法  
守解印綬去南臺會薦天下方面官十七人岳與焉正  
德初擢廣西兵備副使征黑松洞奏捷調廣東尋擢江

西按察使振揚風紀為逆濠所忌連擢其地左右布政使濠橫奪民田億萬計民設寨聚守濠諷總制剿以兵岳力沮之副使李夢陽御史江萬實相訐奏下藩臬會勘岳欲平其理而夢陽務求勝濠從而嗾之執岳憲司舊役考掠誣岳用公堂銀文致送濠禁錮事聞下鎮巡勘報濠左右夾持成獄臺省暨江西撫臣交疏其枉遣大理寺卿燕忠給事中黎奭覆勘竟為濠所陷自誣服罷後濠反伏誅起四川左布政使以母喪未終制不赴

嘉靖初陞右副都御史巡撫江西至則民擁道聚觀手  
額相慶岳奏賑恤受兵郡縣定討逆功及贈祀死事之  
臣皆報可甫三月擢大理寺卿輔臣以擁立世宗功議  
封伯岳遺書內閣所厚蔣冕勸其辭避林俊以司寇召  
至協襄守法一無所假勘事陝西正總兵官李隆罪前  
後凡四上疏皆切時政陞兵部侍郎大同兵變赦而復  
叛岳密令總兵桂勇斬首惡數人事遂定已而勘報及  
大璫弟姪名岳駁正之權倖側目又以議禮忤旨奪俸

言官風聞媒藥其短因力請致仕歸凡十五年卒於家  
岳嚴毅端諒好禮勤書老猶不懈尤喜獎掖後進事寡  
母甚孝念兄鞠哀思罄官俸以報構蒲坂祖祠益祭田  
治先世諸墓至於開渠造橋建社有利於鄉族者槩不  
惜費所著有山齋淨藁吟藁奏議駁藁莆陽文獻莆陽  
志畧等書享年七十二子泓字士流初為逆濠所陷謫  
戍赦回蔭授詹事府錄事疏歸終養

莆陽縣志  
騏撰本傳

柯維  
闕書

閩中理學淵源考卷五十四

欽定四庫全書

閩中理學淵源考卷五十五

廣平府知府李清馥撰

訓導劉子賢先生閩學派

按劉先生閔在成化弘治間一時師友極盛而與鄭公紀切磋最篤者也攷鄭東園遺事謂鄭公與劉子賢先生隱雲洞山中玩易攷禮主靜慎動以求至道一時名士翕然歸仰泉南陳剌夫每來留閱月自言



得見鄭子方覺荒疎修撰羅一峰謫官泉州往返必約鄭氏於風亭僧舍講論數宿曰東園學問心得為多又攷虛齋蔡文莊亦寓書子賢皆企其實踐工夫儒效修著非空言者於時諸公皆一代之英並世而起其出也有鳳翔千仞之槩其處也有潛龍不拔之貞詳攷所立皆涵養深淳原本經術追溯乎乾淳講學之盛無媿也迨後新說繁興講席互設而窮經實踐之意微嗚呼師友傳述盛衰之運可以觀矣

訓導劉子賢先生閔

劉閔字子賢莆田人幼有至性少長知學即絕意科舉  
凡提躬訓家必以聖賢為法祭祀奠獻一遵禮經以父  
樞及祖母樞未葬遂斷酒肉遠房室雖授館鄰邑而朔  
望必歸哭殯所如是者三年鄰族憐之為之助葬婦失  
愛於母出之終身不復娶溫清定省疾不解衣母或有  
怒則竟夕跪牀下副使羅璟立社學延閔為師提學周  
韋菴孟中捐銀助養太守王弼每遇祭祀必延致齋所

曰此人能消鄙吝豈減黃叔度耶亦置田資之閔并受  
不却及母卒即送田還官廬墓三年歲凶弟婦求分異  
闔戶自撓感悟復合弘治中林貞肅俊言其恭慎醇粹  
孝友高古德宇道風自覺難比願禮致入侍東宮必能  
涵煦薰育有所裨益不報正德元年詔授儒學訓導所著  
有家禮考註昭穆圖宗子說五倫啓蒙孝經刊誤等書  
溫陵蔡文莊曾寄書畧曰觀先生所自待斷斷然實地  
根本工夫一掃却許多煩冗枝葉愚意今日大勢如此

匡治之計須是先生輩出身也然雖未即出易之損九  
二曰利貞弗損益之蓋言雖未為時用然其弗損所守  
如此則所以益於上者亦既多矣而況又有所謂子弟  
從之則孝弟忠信者乎小兒存畏今年九歲矣家父母  
留在膝下去先生纔百餘里而未能即時遣詣門下以  
供灑掃途中徒為念之耳

道南源委

蔡文莊集

司徒鄭迂綱先生紀

鄭紀字迂綱仙遊人南湖淑之後舉天順庚辰進士為

翰林庶吉士授檢討與謝一夔劉健周經張元禎諸公講性理之學以經濟相許其為文章披奇剔怪瀾立星回深博蘊藉益探以有憲宗登極上太平十策以親老引病歸養父沒哀毀骨立知府以金助葬謝不受喪畢廬墓讀書與孝子劉閔泉南陳剩夫相往來修撰羅倫謫官泉州亦時會聚講論倣義門家規藍田鄉約朱子義倉以濟族睦鄉家食二十餘年再起供職遷浙江提學副使令諸生兼讀五經白文行鄉射革浮屠毀淫祠

孝宗登極上疏勸御經筵近儒臣論聖學以正心為要  
言甚切至有旨嘉納名為國子祭酒監規嚴正師生凜  
然國學有膳餘銀千兩典簿以常例奉紀曰膳為監生  
何與祭酒悉歸官同官謂紀形其短銜之紀固以前輩  
自處遇科道官不能折節為禮因相與播撫其事論劾  
之孝宗謂紀任未久何遽有此令條析以聞改南京通  
政司左通政七年陞南京太常卿武宗在東宮行冠禮  
紀采古今帝王嘉言善行凡百條各繪圖作贊名曰聖

功圖表啓以進且言皇太子當近正人聞正言不可與  
儼薄內侍遊上優答之陞南京戶部侍郎適南畿災紀  
以漕米權宜水兌積出餘米二十餘萬石賑濟又將月  
糧放支本色以平米價奏革京儲冗食鹽鈔攬納之弊  
皆有惠利及人然竟以前論踵襲言者不已紀亦屢疏  
乞休十七年進南戶部尚書致仕卒年七十六遺命請  
劉閔治喪勿乞葬祭訃聞賜葬如故事有奏議四卷聖  
功圖十卷歸田錄八卷文集前後續別五十卷子主敬

主忠主忠蔭補壽州同知守官飭簞簞而歸田好施祀

鄉賢

閩書

莆陽文獻

主事柯希齋先生維祺學派

主事柯希齋先生維祺

柯維祺字奇純號希齋莆田人幼靈穎希慕古哲林貞肅  
陳孝廉雅重之弱冠領鄉薦登嘉靖癸未進士出黃文裕  
佐之門文裕語人曰異時無忝鴻儒柯氏子也授南戶部  
主事時年二十六即移疾歸烏石山中聚舊業而紬繹之



別淆亂訂是非會萬於一及門之士先後至四百餘人傳授靡倦要以躬行為先慨近世學者樂徑悟而憚積累竊禪家之說以掩孤陋作左右二銘明其意著講纂二卷以辨心術端趣向為實志以存敬畏密操履為實功而其極以宰理人物成能天地為實用至於為學次第懇懇致意於誠之一字謂心與理一之謂誠言與行一之謂誠終與始一之謂誠蓋允蹈之也錄所答問釐為心解學解經解上下傳解史解六卷多儒先所未發著宋史新編共二百

卷閱二十載而成書作史記考要十卷凡司馬之譏評爽  
實班氏之增損乖義少孫之補綴亂真諸儒之紀載異同  
胥辨正之而天文歷律發明尤詳又以莆陽文獻自嘉靖  
以來屢經兵火懼其遂湮乃撰次為二十卷以接山齋鄭  
岳之筆曰續莆陽文獻志與宋史新編俱以三品論人謂  
求道德之士於三代之下必欲如古聖賢難矣但能忠信  
廉潔以禮義為進退以名節自砥礪此其根本也根本既  
立雖乏功業文章不足為病根本既喪即富貴功名鄙庸

人耳何足取哉別著詩文集十卷續集四卷雜著二卷居  
常絕迹不入官府矢志清修力耕節用躬韋布之素有餘  
則推以佐親黨遇倭亂廬毀於寇鬻田以築小室日危坐  
其中接人無戲言無苟笑聞人之短處然必為之諱暮功  
不與飲燕口惟蔬食菜羹而已卒年七十八學者稱希齋  
先生

雄閩源流錄

明名臣言行錄

閩書

興化府志

主事卓起巖先生居傳學派

攷之志乘林貞肅公獎藉人才最盛其一時說經諸

師席公皆勤懇而親炙之為鄉邦倡率為後進典型  
其風俗醇篤有由來已

主事卓起巖先生居傳

卓居傳字起巖莆田人精於經學開館鳳山執經問難  
者前後數百人以鄉薦授金華訓導教迪有方青衿競  
奮登正德十二年進士賜歸省一時士類競趨其門林  
貞肅俊方簡肅良永時過講堂與之談權文義所著有  
書經四書臆說學者宗之終刑部主事門人太守鄭弼

為之起墳

道南源委

莆陽志

郡守鄭諧甫先生弼

鄭弼字諧甫莆田人嘉靖癸未進士歷工部郎中出賑江南全活甚衆推稅蕪湖廉平有體遷雲南知府釋江洋株連之辟平木邦宣撫之亂年四十以親老致仕至九十三卒

莆陽選舉志

簡肅方壽卿先生良永

方良永字壽卿莆田人弘治三年進士督漕兩廣峻却

饋遺為布政使劉大夏所器還授刑部主事進員外郎  
擢廣東僉事瓊州賊符南蛇為亂大夏時為總督檄攝  
海南兵備會師討平之御史坐良永失利大夏已入為  
本兵為白於朝賚銀幣正德初父喪除待銓闕下外官  
朝見畢必謁劉瑾鴻臚導良永詣左順門叩頭畢令東  
向揖瑾良永竟出或勸詣瑾家良永不可及吏部除良  
永河南撫民僉事中旨勒致仕既去瑾怒未已欲假海  
南殺人事中之刑部郎中周敏力持乃不坐瑾誅起湖

廣副使尋擢廣西按察使發巡按御史朱志榮罪至謫  
戍遷山東右布政使旋調浙江改左錢寧以鈔二萬粥  
於浙良永上疏曰四方甫平瘡痍未瘳浙東西雨電寧  
廝養賤流假義子名躋公侯之列賜予無算納賄不貲  
乃敢攫民財戕邦本有司奉行急於詔旨胥吏緣為奸  
推膚剥髓民不堪命鎮守太監王堂劉璟畏寧威受役  
使臣何敢愛一死不以聞乞陛下下寧詔獄明正典刑  
並治其黨以謝百姓寧懼留疏不下謀遣校尉捕假勢

粥鈔者以自飾於帝而請以鈔直還之民陰召還前所  
遣使寧初欲散鈔徧天下先行之浙江山東山東為巡  
撫趙璜所格而良永白發其奸寧自是不敢粥鈔矣寧  
方得志公卿臺諫無敢出一語而良永以外僚訟言誅  
之聞者震悚良永念母老恐中禍三疏乞休去世宗  
即位中外交薦拜右副都御史撫治鄖陽以母老再疏  
乞終養都御史姚鏌請破格褒寵尚書喬宇孫交言良  
永家無贏貲宜用侍郎潘禮御史陳茂烈故事賜廩米



詔月給三石久之母卒詔賜祭葬皆異數也服除以故  
官巡撫應天即家賜勅至衢州疾作連疏乞致仕未報  
遽歸卒卒後有南京刑部尚書之命暨訃聞賜卹如制  
謚簡肅良永侍父疾衣不解帶者三月母病良永年六  
十餘矣手進湯藥無少怠居倚廬哀毀稱純孝焉素善  
王守仁而論學與之異嘗語人曰近世專言心學自謂  
超悟獨到推其說以自附於象山而上達於孔子目賢  
聖教人次第為小子無用之學程朱而下無不受擯而

不知其入於妄弟良節官廣東左布政使亦有治行子重杰舉於鄉以孝聞

學正林致之先生學道學派

按明代莆陽諸前輩多治尚書致之林公精熟是經嘉靖乙酉督學邵公銳延請於三山主教恭敏馬公實師承其說焉時三山鮮習是經故邵公特延致之余攷之經籍攷馬恭敏之子歛序尚書數言云再攷公從學於蔡王二先生其平日為學大旨未知如何

至恭敏馬公之學閩書并蔣氏閩學源流皆以為宗  
程朱之學者

學正林致之先生學道

林學道字致之莆田人體不勝衣言不出口而向道甚  
勇義利之辨甚嚴終日正襟危坐非寢不脫巾履初從  
蔡文莊受學復之江西從王文成訂良知之說嘗游吳  
下有僉事某者延至其家既而聞其居喪宴會曰非吾  
徒也遂去之督學邵銳選取閩中於會城書院分經擇

師學道與焉司徒馬森其及門士也徐文貞階謫延平  
願請一見竟不造門至嘉靖間以貢授都昌訓導文貞  
亦督學江西喜曰吾今得見林致之矣為題像曰顏勤  
閔孝柴愚參魯若在聖門依稀參伍終無為州學正卒  
學者私謚曰貞修先生所著有原教錄二卷

道南源委  
莆田志

王侃齋先生學派

王侃齋先生

闕

陳碩飛先生薦

陳鳶海澄人字碩飛幼讀書與兄英及中表林浩相友  
聞莆陽王侃齋以道德淑人相與負笈從之既歸以禮  
自閑築室家廟之旁非弔喪問疾不出倦時或散步郊  
原悠然自賞藝圃必正樹菓木必直而方對夫婦如嚴  
賓延納士流溫和不掬時以正言格論誘人所交林克  
諧夫婦染疫暴卒無敢至者鳶奔往經紀其喪嘉靖丁  
巳寇掠月港焚毀悉盡惟鳶居無恙郡丞許鑰聞其名  
餽餉不受海憲周賢宣至澄訪之鳶使家人辭曰某隸

居編民有公事召無相見禮不敢見疾革命弟子以喪  
禮危坐而逝

閩中理學淵源考卷五十五

欽定四庫全書

閩中理學淵源考卷五十六

廣平府知府李清馥撰

莆陽嘉隆以後諸先生學派

縣令歐須靜先生志學

歐志學字須靜莆田人淹貫經傳以貢入南雍海內交重之吳中諸文學爭延為師領嘉靖乙酉鄉薦知潮陽縣興學育才人文遂盛歲餘乞歸當道留之不可既歸



開五經講席四方負笈者相踵所著有四書淵源毛詩

小見衍義補要等書

道南源委

閩書

縣令阮先生琳

阮琳字廷佩莆田人嘉靖庚子舉人除金谿教諭為諸生講明正學擢知恩平勤撫字興學校文學吏治一時推獎以老丐歸結境真會誘誨後進所著有書經講義性理儀禮律歷註解圖書記愚諸集

道南源委

縣令陳立夫先生繼芳

陳繼芳字立夫少穎敏勤學通五經為文詞多有理解同輩咸推讓之嘉靖丙戌進士授金華知縣廉介自持奸徒屏迹甫七月以病疏歸養家貧甘旨乏供乃設帳嘉禾因而負篋從遊者甚衆所著有書經精講至今以尚書起家者咸宗焉

郡守林廷彬先生華

林華字廷彬蚤孤家貧奮志讀書嘉靖壬辰進士授南京戶部主事改北刑部轉員外郎皇親張鶴齡繫刑部獄華坐累謫六安州同知巡按及督學擢為諸生師建

岳麓書院令主之著岳麓口義十卷量移長沙同知尋擢鎮江知府公暇講學如岳麓時與徐問唐順之往還議論為守五年多政績最大者平民羣訴豪家擅洲田久不決華斷為公庄收其租以省民需富民毆殺人獄以賄停華立斷論死時宰夏言以獄託華不從嗾巡按御史誣華激變逮繫詔獄發鎮江哭而送者幾萬人擁傳車不得行逮者愕眙且笑曰是可以用為激變矣華至京上奏自辨世宗疑之而臺省亦多言其枉於是薄華

罪罷為民家居十七載不入公府性簡靜寡合鮮交晚年蔬食不與飲讌年六十七卒

莆田志

參議黃以約先生文炳

黃文炳字以約父敬甫明經修行里人敬之稱曰木齋先生文炳嘉靖乙未進士授南戶曹郎度支會計惟謹權北新關務除細苛所入稅金下仁錢兩縣典出納關吏不得染指又以羨餘牒計司助餉商民感惠歷江西僉事參議文炳在江西久於分宜相無夤緣竟以罷免

人稱其有守

莆田志

縣令宋斯齋先生效周

宋效周字肇斯莆田人領嘉靖辛酉鄉薦由海陽教諭陞和平知縣以德化民羣盜解散時制府徵令煩苛效周移書規諷遂被論劾致仕歸家絕跡公門教人以經書小學為常課謂嚮往須擇中守正造詣須積漸至精工夫須循常務實所著有愷愷子蹠蹠言日格子正俗編等書學者稱斯齋先生

副使陳士仁先生祥麟

陳祥麟字士仁嘉靖丙戌進士授東安知縣東安地狹  
隣邊時詔徵土兵討田州所過騷掠祥麟搜剔弊蠹犒  
餉具而民不擾嘗修學宮作社學毀淫祠改諸佛刹為  
書院以廉能調麻城足疾疏改湖州教授主江西文衡  
所得多名士遷南京刑部主事常提獄命人洒濯囹圄  
不深錮諸囚囚甚德之歷員外郎中出守姚安郡雜夸  
難治祥麟約以威信靡不輯服母喪服闋補南安或有

諷祥麟稍稍為子孫計者祥麟慨然曰昔人遺後世以安吾豈欲置之危哉嘗自言吾自筮仕以來未嘗置一人於重辟及謫戍者其廉慎仁愛類如此擢山東提學副使至則崇禮教作士氣每閱諸生文義必為之芟削改正以積勞卒於官士林傷之同寅檢行橐蕭然各捐俸為賻所著有四書詩經正蒙行世

莆田志

郎中陳宜昌先生言

陳言字宜昌觀七世孫少敏博精尚書嘉靖丙午鄉薦

第八人明年會試第四人肆政禮部時秦和歐陽德為宗伯深器重之屬吏部補其縣令言惆悵簡易奉職循理不喜矯飾逢迎以媚大吏大吏有索賄不得深嘆之者遂乞改學職得湖州教授二年遷國子博士轉禮部儀制司主事教習駙馬都尉故事都尉率驕貴易其師師取具員而已言抗顏臯席人咸重焉越明年太宰李默被讒死言亦坐鄉故謫郴州同知已移守泰州徵拜南京刑部員外晉郎中無何免歸言性真率無他腸不



習巧宦居家以孝友稱嘗修葺先世祠塋恤宗戚貧乏而撫其孤寡行敦本原所著有尚書講義六卷怡老堂存稿四卷石溪僂語二卷以子經邦貴進階一級贈吏部左侍郎兼侍讀學士

莆田志

郡守林孟鳴先生兆珂

林兆珂字孟鳴富孫嘉靖壬戌倭陷郡城與兄兆瓚俱被繫倭刃磨兄頸兆珂以身翼蔽倭義釋之萬曆甲戌進士授蒙城知縣改儀封教授陞國子監助教轉博士

監丞任成均七年董宗伯其昌范少卿允臨皆所取士  
陞刑部主事歷員外郎中為大司寇註律例二十卷出  
為廉州太守丁內外艱補衡州又補安慶十年三典大  
郡歸之日囊無餘貲先是祖富總制兩廣奏罷採珠之  
令廉人德之兆珂至先以太守行有司祭禮次日以諸  
孫行家人祭禮廉人榮之因作採珠行以歌祖德所至  
禮名宿拔寒畯然性諒直不能婉曲事人辛丑大計後  
假歸遂為終焉之計家居二十載鍵戶讀書丹鉛不輟

所著書宙合多識二種其最著者又有批點左傳檀弓  
考工參同契楚詞李杜王摩詰選詩諸書刻林艾軒楊  
升菴陳山人諸集皆行於世平生篤友誼故人有鄭某  
者老而無嗣兆珂為營墓於松嶺之麓歲時祭掃必率  
其子姓酌酒酌之所著書成恒令布衣人撰序曰古云  
名譽不聞朋友之過吾將以樹其名也故一時文士多

歸之

莆田志

布政林仲清先生澄源

林澄源字仲清嘉靖己未進士授戶部主事遷員外郎  
中出為貴州叅議屬水西安酋亂當事者方議用兵而澄  
源以蠻夸叛服靡常勦孰與撫便已而出兵殺傷過當  
卒用其言撫之事遂定逾年晉按察副使備兵威清即  
用前所撫首授以方畧寇發輒誘禽之滇黔宴然晉參  
政鎮威清如故鄒進士元標以論劾江陵戍羅施道由  
境上澄源與盤桓彌日人或危之澄源曰昔徐晦越鄉  
而別臨賀后山出境而見子瞻彼何人哉吾分已定即

緣此得罪吾固安之因名其菴曰定菴後以廣西按察使覲畢轉四川右布政乞終養歸歸後言者復摘其馳傳事中之則猶江陵之為也居家孝友恬靜部使者交章論薦竟不起著有悟往吟及經傳講義

莆田志

林懋勛先生兆恩

林兆恩字懋勛富孫生有異質年十三好袖金散給貧人母詰之曰損有餘補不足天道也既補弟子員試皆高等已遂棄去銳心學道嘗憂正學榛蕪世趨二氏謂

二氏之粗者吾儒所不屑精者不出吾道之範圍遂合  
三教而發明之著書積數百萬言大要以三綱四業為  
本歸儒宗孔為急隨在獎勸凡士農工賈縑衣道流人  
人厭其意而去時倭薄郡城會衆募兵却之又饑旱游  
臻發粟拯濟賴全活者甚衆城陷後埋胔掩骼不遺餘  
力人尤德焉天下名流耆宿讀其書者無不降心北面  
願為弟子書幣之請殆無虛歲其教人先從治病始以  
此小試非其極也學者稱為三教先生

莆田志

參政盧鉉卿先生廷選

盧廷選字鉉卿萬厯壬辰進士知滄州鋤奸摘伏獄無  
滯訟時方興橫海舟師大軍出於滄供億驛騷少不給  
則立廢廷選馭應有方無敢譁者巨璫挾稅柄凌轢州  
郡廷選以民艱抗議詞色從容璫慙沮而戢歷工部郎  
中出知南昌府南昌故多才廷選集士課文諸生呈藝  
與爰書並列凡案間剖決品藻無不各厭人意者修東  
西二湖堤弛漁利以予民歷江西參政議減宗祿就各

宗現在之折額以均惠於待封之子孫時用其策諸郎  
悅從著為令尋以蜚語解組去家居數載復起為湖廣  
參政修城垣繕干楨為固圉計盜徐賓踰城剽巨室輿  
議以盜伏城中當排門大索廷選獨不謂然密遣邏遠  
地跡之盜果獲卒於官方病中檄武昌嚴察郡獄多滯  
因勢將有變歿數日而難作楚人以為神云所著有四

書質義尚書雅言浴碧堂集

莆田志

劉徵仲先生文暘



劉文暘字徵仲讀書秉禮授徒尚義與姪正隆交相愛敬即閭內亦無間言後正隆領鄉薦官國子博士歸冷署無長物可獻數以為言文暘曰青氈故物正獲我心郡守王弼高其行數造廬請見旌其門曰一鄉善士卒年八十九

莆田志

劉陶九先生堯章

劉堯章字陶九讀書百原山中因以為號少便超超異行輩為文沉思入微幾廢寢食未幾閩亂遂挈家入寒

山僦居何巖之麓專意聖學靜坐三年已而入百原刻意堅苦理數象緯靡不推究而返之躬行常曰涵養工夫全在應事接物上簡律一身不敢自恕意念間稍有愆違輒正色危坐終日會山中寇亂欲屠兩砦堯章挺身出見皆賴以全衆德之歸田以謝堅却之居家孝友與兄共爨無間言時兄有子五人堯章子二人及析箸以所遺產分為七五與兄而自取二焉曰吾不忍令吾兒獨豐也人咸義之性和易近人及義之所在毅然為

之嘗讀春秋傳註頗疑其鑿後得湛甘泉正傳曰此可以知聖人之心矣乃下穀城與舊友商訂成書未就而疾作將革命取陳白沙示門人六絕吟咏者再點額而逝

莆田志

副使陳鳴周先生騰鳳

陳騰鳳字鳴周萬厯丁未會試第二人授開州知州州多巨慝習弓馬乘突騎要截行劫商旅畏途騰鳳廉其實以計誘得巨魁立殺之自是賊徒屏息澶淵久困水

患騰鳳設法隄防民得安堵丁內艱服闋補禹州復調太倉州妻有隱糧七千五百餘石或為田衝蕩或為冊漲混者民困於輸供騰鳳不避勞怨逐一洗刷遺累洒然陞兵部員外郎出為河南提學僉事秉公矢慎首拔者悉皆入設有河洛九十元魁卷鐫行於世部覆稱最加銜再任轉浙江糧儲副使勤運輓部推卓異離任日却羨金三千盡充公儲乞歸養冢宰趙南星覆疏云人方仰其有守而有為本官則已知止而知足家居二十

載杜門守靜所著有四書講意尚書要言及靜虛齋集

卒年七十二

莆田志

孝廉林燕公先生尊賓

林尊賓字燕公莆田人崇禎壬午舉人肆力於六經諸史百家著春秋傳於三傳外別有發明又以禮記附會成書乃翻去陳言著為評定復取朱子未成之志合三禮而通之綴文成類共得十篇名曰古禮當然一時倪元璐張溥陳子龍錢肅樂輩皆折節下之計偕入都值

閩賊陷京與從叔說同矢殉國著有鴈園集四卷

莆田志

### 林雨可先生承霖

林承霖字雨可幼時為諸生即以古人自期入麥斜巖  
潛心理學家貧妻子藜藿不飽絕不為意山中人皆呼  
曰林先生與同郡謝天駒同彙次莆陽四編行世天駒  
字山子攜家入山置書數千卷吟咏編摩於名利視之  
漠如也

莆田志

### 鄭牧仲先生郊

鄭郊字牧仲博學能文幼嗜經史長以著述自任家雖困乏意豁如也補郡弟子員為督學郭之奇李長倩所賞識拔置第一嘗謁銅山黃道周稱之曰鄭牧仲一日千里未易材也雲間夏允彝徐孚遠皆與定交已居壺山之南泉遂號南泉居士未嘗一至城市著書甚多註易十七卷廬陵知縣于藻為之刊行尚有史統百四十五卷及南華十轉水書折衡偶筆寓騷孝經心箋及雜詩文若干卷藏於家弟邾邑諸生好學博識與郊齊名

督學李長倩首拔食餼安貧樂道所著有皆山集及易  
測詩史和陶廣騷春秋表微諸書門人郭鳳喈字友日  
衛庠生性高潔工詩著有郭子詩草

莆田志



閩中理學淵源考卷五十六

欽定四庫全書

閩中理學淵源考卷五十七

廣平府知府李清馥撰

泉南明初諸先生學派

泉自朱子過化之後人才蔚起明初諸賢大都抱道守義恬於仕進而崇尚經說範圍禮俗猶然清源別派遺風也今志乘可考者張氏廷芳首著易說陳氏道曾精邃易學趙氏復以禮教倡鄉閭莊氏逢辰以

朱學式後進其餘或隱身明志或秉節傳經各著顯  
晦之遭祇求立身之的要皆根柢乎先民矩度與遺  
世絕俗者異矣迨後蔡文莊先生獨倡宗風而紫峰  
淨峰次崖紫溪諸公相踵起紹源濬流漸摩數世遂  
成閩學一代人文之治回溯當時清源別派不更昌  
大而益光乎語云山川之秀有開必先則國初諸君  
子皆有啓迪衛道之功不可無述也今併錄出以備  
考訂焉

張先生廷芳

張廷芳晉江人世家城南方山下父謙齋以文學召為石井書院司糾廷芳世其業以講明理學為已任冠婚喪祭一遵朱子家禮自號退密翁以見志嘗著易經十翼章圖蘊義十卷未上卒於家

泉州郡志

雜闕源流錄

趙莊節先生復

趙復字無疾晉江人隱邑之孤山博通經史不求仕進泉俗冠婚之禮率敝於侈靡喪葬之禮多壞於浮屠無

疾惓惓以古禮為之倡人多化之卒年九十五門人私

謚曰莊節先生

雒閩源流錄

舊郡志

閩書

莊士明先生逢辰

莊逢辰字士明晉江人元季躬耕養母雖在亂離中不釋書卷母卒喪葬一據朱子家禮洪武初或勸之仕不

答曰惟教子讀書後進多師之稱靜齋先生子琛

泉州郡志

閩書

州判劉子中先生嵩

劉嵩字子中晉江人博通經史所為詩文清新奇古不  
俟思索人謂其有謫仙才值元季不仕磊落不羈以詩  
酒自娛家無宿儲而處之泰然有知其貧而餽之者輒  
正色以謝或受所可受即送酒家及調親友之乏者洪  
武初以賢良方正薦授廣西賓州判官卒於官旅櫬不  
能歸州人葬于州之門外泉之名士多出其門所著有

中齋集

泉郡志

學正陳端誠先生道曾

陳道曾字端誠晉江人祖章應洪武四年進士以學行  
聞歷官禮部主事道曾性資樸茂邃於易旁及諸經子  
史有文名操行卓然不苟徇流俗登永樂十六年進士  
改庶吉士自陳願授教職改吳縣教諭陞瑞州府教授  
遷無為州學正所至以師道自重衡文湖廣浙江山西  
俱以公明稱卒于官所著有吳下集筠陽濡須等集

志

泉郡

陳汝納先生亦言

陳亦言字汝納晉江人元至正間自古田侍父瓊來官  
本州鹽場因家焉刻苦力學貫穿經傳子史於詩賦尤  
工洪武初世路清平猶不樂仕進日惟與蕭子玉趙應  
嘉趙仕寬輩相往還講論吟咏所著有潛齋集

泉州郡

志

閩書

### 趙應嘉先生士亨

趙士亨字應嘉晉江人元季隱九峰山杜門讀書以求  
聖賢之學父早喪明母復老病奉養周至湯藥必親累



歲不少懈父母相繼沒居喪盡禮廬墓終喪乃歸教授  
于鄉時山寇呂光甫嘯聚剽掠所至焚燬獨戒勿犯趙  
先生閭舍洪武初由人材薦授繁昌縣仲窪河泊官強  
赴焉尋引疾告歸

泉郡志

徵君陳栢崖先生獻

陳獻字敬仲號栢崖由福州來家晉江性孝友不求聞  
達工詩詞宣德間累召不起號為徵君

按徵君為宣德間隱德其著述藝文志莫考矣韻  
於前歲得徵君送先六世祖樸菴府君之官序文一

篇於從祖茂夫先生家附在族譜鈔本後序末題  
云景泰元年庚午九月吉日閩郡陳繼序序中自  
云與撲菴府君素相知云其序文節畧載斯編清  
溪李氏家世學派卷末乾隆丁丑五月下泮清馥  
識謹

### 夏西仲先生秦

夏秦字西仲晉江人或云元進士不知何許人避亂來  
泉先館涵江後居青陽授徒自給文以行重諸家誌多  
出其筆洪武十五年以儒士召至京師稱老疾辭歸郡  
守胡器敬重之每來訪蒞湯麥飯共溫飽而登高眺遠

念及民間之未炊煙者胡守行贈以詩曰離筵對芳草  
去路遶青山日暮雙旌遠邦人拭淚看得此而守名益  
顯都下傳誦之以為二十顆珠也胡後歷官祭酒至永  
樂壬辰西仲猶稱郡庠正賓九十六翁云李氏叔元撰  
青陽五先生贊曰青陽祭於社者五夏李蔡以德莊以  
功餘不乏通顯瞠乎後矣從西仲者碩士張德亨里人  
始知有詩文之學云

李氏叔元撰青陽五先生傳

陳白齋先生

陳白齋名未詳按李氏叔元撰陳處士約齋公墓志云  
陳白齋倡道於石井書院其弟文齋以行業佐之其名  
并籍貫待考

李鹿巖先生文集

吏部楊先生端儀

楊端儀晉江人永樂三年鄉薦第一四年進士歷官吏  
部主事泉郡學科目題名碑記云朱都憲鑑揚御史智  
蔡文莊清趙提學珏揚吏部端儀皆由省元入仕學識  
淵源行檢醇正有功來學數君子祠于鄉賢昭于碑刻

率皆先實後名者咸可稽焉按楊公事實未詳今觀碑記側於蔡趙諸公之列共稱學識淵源碑立在明正德十六年郡守無錫葛氏恒里人留氏志淑田氏崑同刻石者留田二公皆鄉之望可見鄉評亦同云

朱簡齋集

侍郎楊松軒先生輿

楊輿字士載號松軒晉江人父曜宗經學純正仕至長史引年家居屢以忠君孝親為鄉後輩言之為文溫潤典則輿幼好讀書未弱冠能屬文通五經尤長於春秋

子史百家莫不通究嘗言場屋制度過嚴遂與徵士陳  
璘溫良朱鐸蔡翼何祐輩為友不求聞達建塾授徒門  
人數百多有學成亦不應舉與召養於學校者戒之曰  
爾可比樊籠外者耶厥後如林同莊諫丘璧皆以科名  
顯宣德乙卯上命進士黃某纂脩實錄以輿有三長為  
郡總裁實錄成郡守蔡錫以輿明春秋經薦授惠安訓  
導丁內艱服除以學行純篤擢郎府伴讀王入繼大統  
邸臣皆蒙顯秩獨輿出為處州知事值山寇發巡撫委

與捕治設方略連破沐溪方竹賊巢九處事聞召見文  
華殿問民情苦樂對曰無苦民事則民不苦歷陞南京  
戶部右侍郎天順改元謫永州廣西苗賊滋蔓興發策  
備禦寇不入境一時政教畢舉癸未入覲引老乞歸燕  
賜甚腆詔有司加禮焉家居十四年與朱簡齋鑑相友  
訓迪子孫力學治家嚴肅非禮行則不入公門於丞嘗  
則嚴潔承祀有問學者則條陳本末人樂近之所著有  
松軒集朱簡齋誌其墓

閩書

朱簡齋集

郡志

博士張先生寬

張寬晉江人正統丁卯舉人四擁臯比以醇誠博雅為名博士所至與諸生講易娓娓皆性體心宗臺使輒署上考而甘隱乞休嘗自題曰質不美皆困學而知貌不莊唯正道自持不敢虛天之賦予而尚敢較位之宗卑有司為立坊表曰种霄

閩書

州牧楊思明先生智

楊智字思明晉江人幼有大志既領鄉薦聞臨漳林蒙



庵有性理學往從之游三年歸登天順八年進士擢南京監察御史成化四年客星變為彗星智上言妖彗示變災異迭至自非君臣恐懼旁求直言改革弊政進君子而退小人不足以弭天變宮闈之事臣不敢言望陛下深自省察裁處其在廷大臣南京守備成國公朱儀參贊機務兵部尚書李賓並猥瑣無當不足膺根本重地吏部尚書章綸則遣子應元冒貫京衛軍餘欲覬京闈之薦刑部侍郎王恕則娶指揮妻旻氏為繼而甘偶

失節之婦工部侍郎范理外似撲而內姦貪大理寺少卿金紳喜徇私而多賣法應天府尹畢亨賞緣擢用行聖公孔宏緒之淫慾驕恣凡此妨國病民皆足以召致天變疏入遂賈衆怨朱儀尤惡之會郊祀百官赴內府光祿寺點齋日尚未晏儀令人早鑰禁門智不得出為內臣邀宿儀發其事以奏有旨械京問擬上以郊祀重事而智不謹有玷風憲特降三級為廣西布政司照磨久之轉化州知州卒于官智歷仕未久其志節已卓然

可稱黃氏仲昭稱智醇厚恭謹平居春風襲人義激於中則如秋霜烈日凜不可犯歐陽子所謂氣剛色仁思明有之

泉郡舊志

閩書

縣令鄭懋中先生醇學派

按明初泉南傳習派系多無可考惟朱簡齋先生年譜載鄭懋中方從善高顯宗周太初諸公皆受簡齋之學者數公惟鄭氏有傳餘亦未詳維時風尚樸厚人文方興觀簡齋平生立身本末以忠孝承家退身

數十年如趙氏瑤莊氏恭皆公獎藉在友教之列論者謂為一郡風教之倡不亦宜乎虛齋先生未發解時尚及見公其序簡齋之文謂公自幼至老講學弗倦以明其理力行匪懈以踐其實故能於父子君臣彝常大義各盡其道厥後王氏宣等為請祀于鄉最後何鏡山黃石齋蔡獻臣諸公同揭請謚雖時議未從然而一代之公論可審矣謹備列著之於篇

縣令鄭懋中先生諱

鄭懋中名醇以字行晉江人洪武丙子應天鄉薦授知  
程鄉治先禮義不尚法律民謡頌之程鄉民鮮知學懋  
中至首作新學校親為生徒講解自是始有登第者一  
日感疾戒其子具湯沐正衣冠端坐而逝民哀慕之立  
像於漢令曾芳之祠合祀焉朱簡齋祭之文曰先生懷  
忠敬以為徒蓄詩書以自娛踐履篤實確乎不可以為  
迂宅心孝友誠哉所謂君子之儒

泉郡志 朱簡齋集

都憲朱簡齋先生鑑

朱鑑字用明晉江人父則文以孝著稱鑑成童刲股愈父  
父竟不愈哀毀逾常力貧奉母常游鄭樵中高宗顯周  
太初諸先生之門永樂中以舉人授蒲圻教諭宣德初  
擢監察御史巡按湖廣時副使僉事不行分巡屬吏殃  
民無憚鑑請如故事周巡所屬以安民察吏具得施行  
梅花峒賊久剿無功鑑詣諭皆解散湖湘風俗務外貨  
殖男女過三十尚無室家鑑申明洪武禮法旬月之間  
結親者動萬計考滿代歸正統初復命巡按廣東奉命

錄囚多所平反招撫逋叛甚衆禁奸戢暴所至肅然代  
還朝命成國公朱勇簡都指揮等官三百餘員習孫吳兵  
略歷代臣鑑等書擇御史有文武材者董其事右都御史  
陳智推鑑鑑乞開設武學以典武科奏可遂為定制七  
年用薦擢山西布政司左參政權璫王振擁大駕北征  
鑑上疏懇留極言敵勢猖獗北情不測時大駕已出不  
可復止土木之變景帝以郕王監國陞右布政使尋進  
右副都御史巡撫山西保障雁門鑑垂涕憤恨以君父

之讎不共戴天上疏言額森奸詭百端殺掠無已復假  
和親往來偵伺蓋以送駕為由則必開關迎接稍示拒  
抗彼必有辭彼謀既深我慮宜遠宜急擇將練兵暫停  
中貴監軍假以生殺賞罰重整散漫之兵復募壯勇之  
士重懸賞格厚酬爵祿再徵勤王之兵夾攻並進戮力  
復讎庶大駕可還敵兵自退又切見太監王振毒亂天  
下震驚神器自江南草寇生發皆以誅振為名夫事歸  
朝廷則治歸宦官則亂為厲之階莫甚於此昔高皇帝



與羣臣議事必屏去左右恐泄事機伏望聖母陛下邴  
王殿下念祖宗開創之艱將相披臥之苦急立儲君選  
智勇託忠義早草內侍之權再造中興之業庶雪前恥  
以圖後功疏入太后讀之至於泣下及英宗北還景帝  
勅邊將出兵掩擊北人鑑上疏言額森慕義請和送還  
太上彼以誠來我以誠報彼盟未叛我兵先出失信啓  
釁深為未便詔嘉納焉後景帝廢太上皇子自立其子  
為東宮鑑貽內閣陳循書責之言前者至尊蒙塵宗社

安危非得長君人心未定姬周輔成故不得已今鑒興  
既歸歷數有在委裘而治亦無不可太子仁孝天下共  
知在廷文武羣臣共立不能夾輔烏可易置抑僕復有  
言陛下於太上皇論骨肉則當避位以全手足論尊卑  
則當固讓以盡君臣乃藉口防微反為幽閉珍羞節其  
日膳雉堞增於宮牆是可忍也孰不可忍循省書怒甚  
鑑亡何乞致仕歸英宗復辟鑑念君父大恩詣闕上  
表賀時石亨以奪門功荷特眷銜鑑前劾失機疑鑑

欲復仕於上前極力排詆上以籌邊老臣無所闕仍  
賜致仕鑑厯官中外凡三十年諫疏至數十上歸里  
凡二十餘年年八十八卒賜祭葬所著有願學藁行  
於世

明史年譜

備考

何鏡山先生撰簡齋朱公年譜序略曰某讀史至司馬  
溫公傳平生所為未嘗不可對人言輒廢書而嘆曰嗟  
乎詩稱旦明傳首慎獨古昔聖賢於余影莫知之地蓋

三致意焉洎自世降而下學者樂為致飾以相競於翕  
訛詭隨之途義利攸分不堪自問豈復播以示人苟非  
詣力精深卓然天定鮮有不為流風習俗所靡者觀公  
之自少而長而壯而老既致身以事父復力貧以供母  
精勤王事養退引年効疆場之孤忠賦遂初之雅志若  
自微而顯者言之則刳股和粥露頂籲天是可質之神  
而何不可以示之民倡議立儲移書執政是可以孤行  
於一時而何不可共白於後世故其追叙生平也大書

特書分年別月周旋語默細大靡遺是非道貫心誠卓然天定自慎於衾影莫知之地曷克及此

名山藏臣林傳贊曰朱鑑時當倥傯有守邊功且其意在上皇而事不詳士大夫之口予讀其私傳家譜因為載之鑑上循書足振朝議之靡不見傳說而疏名賞金者獨著于世予得不為之扼腕耶

黃氏河清曰詳公之世有足陰維社稷動天地而感鬼神者惜彭惠安錄本朝名臣於公偶遺之余考吾學

編名臣記弇山賞別集都御史表亦俱未錄余故備書

以俟補錄者

詳見清源文獻

王氏宣序公行實略曰土木之變郕王監國廷臣皆謂  
宜承大統以安人心而公獨以邊遠孤臣上疏太后請  
立儲君辨大義於狐疑之秋越易儲詔頒公雖矢石疆  
場間憤激馳書切責宰臣極言廢立之非且言於上皇  
論骨肉則當避位以全手足論尊卑則當固遜以盡君  
臣蹇蹇諤諤言當時之所莫敢言亦言當時之所不可

不言知正綱常罔恤忌諱知盡臣職罔顧身家當事果欲謀擠而公以懋勲至誠格於九重得免于禍云

縣令李先生紹學派

按泉自明初永樂間陳氏道會以易學名而立說則自張氏廷芳著易經十翼圖蘊義為始志乘載先生  
在正統間以歲貢為合浦令遽於易餘事實未詳今  
考其門徒傅氏凱亦深於易其侄汝嘉承其家學者  
至雁山先生雍尤以師道自立林氏龍峰其門人也

彼時虛齋倡明易學尚未顯著而諸先生遞相講明  
如此可知泉之經術淵源有漸矣

縣令李先生紹

李紹晉江人按紹在正統間歲貢後為合浦縣令遷於  
易

主政傅時舉先生凱

傅凱字時舉少年材器拔萃究心易學成化十四年  
進士授戶部主事提督天津等八衛督催南畿



浙福財賦以賑西北饑旱事集而民不擾謝政歸日  
與諸士講習有文譽四方求文者踵至子浚孫櫟

泉郡

志 清源文獻

參政李雁山先生雍

李雍字欽讓號雁山晉江人舉弘治六年進士未謁選  
請告歸養林龍峰同曾往受學焉親終出仕廷議以雍  
篤孝清苦特薦吏部授驗封主事時人謂之赤脚吏部  
轉文選郎門無私謁正德初逆璫煽禍時時欲樹置其私

人雍介然抑之為附瑾者所忌出為南寧太守時在吏部已九年矣臨行蹇驢敝笥而已至南寧因俗為政不立赫赫名值歲艱請于朝減民租十之四瑾誅清聲暢蔚擢廣東參政會枹鼓起巡撫都御史林廷選手書致之雍躬履戎行不遑啓居遘疾卒電白官舍南寧人祠雍名宦載之郡志

閩書

參政李荊泉先生汝嘉

李汝嘉字士美號荊泉父松巖二歲而孤祖母陳氏苦

節鞠育縉紳大夫若修撰羅一峰先生為之立傳賦詩  
松巖後讀史知大義遂為鄉邦領袖汝嘉比長就學乃  
從叔父合浦令紹日記經傳數百言為文下筆立就舉  
天順甲申進士授戶部主事有貴幸侵民田者朝命覆  
之得實奪以歸民擁湖湘商舟清兩廣財賦搜剔奸蠹  
無敢私干尋陞金華知府道聞母喪歸服闋改衢州脩  
建郡邑二學均徭役賑貧乏葺武備雪冤滯建橋梁衢  
人頌之後陞淞江參政致仕孫繼芳以鄉薦授六安州

學正擢乳源令以平賊功陞刑部主事歷官貴州僉事  
備兵思石以參議致仕壽八十餘繼芳醇深有度簡靜  
自守弟繼華以鄉薦知始興縣有政績始興載之名宦  
所著有四書日講

閩書

閩中理學淵源考卷五十七

欽定四庫全書

閩中理學淵源考卷五十八

廣平府知府李清馥撰

學憲趙古愚先生珩學派

按古愚趙先生成化間人物也為虛齋先生前輩其  
治躬敷政重名教尚氣節洗冤恤患鞠訊如神惜遺  
事湮沒者多而發明經書諸著作亦散佚無傳矣鄉  
先生每三復致愾有以哉今攷志乘所載蒞官粵東

時與陳白沙論學辨難見於白沙往復之書其在家鄉惟羅一峰謫泉之時相與上下議論羅公累日過從一盂一豆日晏忘食講究不輟先生故以經術名而羅公以直節宿學共相淬礪一郡風教之開二公蓋亦有助焉後之人能無遠邇其典型哉

再致先生門徒莫詳

惟一驪王氏宣集中書薛文清讀書錄後曰余年十二墾吾泉廣東提學僉憲趙先生家見薛公讀書錄若有契於心遂求於舅而得之以歸云致廣東僉憲趙先生即古愚先生也王公平日必經側聞講論者姑附學派之列待攷焉

學憲趙古愚先生珩

趙珩字德用晉江人宋宗室懿王德昭後丞相趙公汝愚裔孫生九歲而孤依女兄適粵人劉簿者益刻勵為學尤尚志節雖貧窶不妄納交人粵有富人介簿求通先生不應謂不義而厚行將及矣遂自粵歸亡何而富人果敗其先識如此成化元年領鄉薦第一明年成進士授刑部主事先生精於鑒文能知人富貴貧賤壽夭如券合無或爽者嘗校士禮闈得餘姚謝遷試牘詫曰



宰相才也大廷之對必衰然舉首遂力薦主者後俱如  
所鑒出為粵東提學僉事便道過家適羅一峰謫官泉  
州累日相過從辨論不厭每盱設食一蔬一豆忻忻如  
也在廣時日以學術提醒士心校士諸州每卜其器業  
於文而引之所嚮士賴以成就者甚多又嘗校文瓊州  
士第悉下無與省闈試者諸生譁然有司亦為之請先  
生曰若不知也吾殆以全若占若等文氣有青焉遠涉  
其不利乎衆不謂然固以請乃聽試當往道海上漂溺

失舟人始驚歎趙先生神人也先生故以經術名顧又  
精吏治有粵豪漁食閭里持吏短長至姦人婚娶女吏  
不敢問如是者數十年先生聞按獄得實而置之法為  
學原於人倫言論風旨多足感動人者尤重禮教是時  
新會陳白沙獻章論道江門先生嘗訪之訂以經訓之  
言間不合必移書再四白沙每論教人禮非所急先生  
力正之曰昔胡餘千不教人習四禮論者至今以為疑  
流風易移何輒開斯路乎白沙謂德用之心即一峰不

欺之心復書曰一峰死僕哭之慟以為今而後無復有如一峰者不謂於執事見之嘗登厓山見元張弘範勒石以詩斥之親固貧又復早背諱日不能知常祭以已之生辰必涕泣不自禁在官嫁族女者三娶婦者五殫貲以給而宦橐固蕭然也年方強卒於官所著書有四書管見禮經解疑綱目便覽宋史集要諸編悉燬孫子復零替葺門蓬戶而已獨其遺言逸事至今人士喜談而樂道之丁氏自申曰某自束髮以來即知有先生軌

寤寐向往者久之間訪其遺文得所謂椒軒記讀之蓋先生初第時作也其言耿然有礪名砥行矜古振俗之志而先生立身居官大節槩可想見至其文字冲雅淵懿允矣造道之言惜乎不可多得聞先生卒官嶺表飄零以歸重遭回祿之厄頃讀其外孫周君所為傳與其平日所記聞者尤核且確自周君之傳出而學校鳴之當道旌之學士大夫羣而和之先生之潛德久而彌芳矣顧采風未逮而曠典尚缺春秋俎豆邈焉未舉豈非

後生者與有責哉考吾郡在成化間前有先生後有虛齋二先生里居相望先後發解登第又相繼為督學憲臣蔡先生試士江西一舉而登首拔者五十八人見於交游書問中首舉士舒梓溪即許其魁天下後無不驗當先生為考官得餘姚謝文正試牘已物色為殿元宰輔其督學廣東也於校文中預卜人休咎其鑒識與蔡先生又同二先生德學造詣無容置論乃其品題藻鑒什不爽一此其故何哉趙以愚蔡以虛明生於愚靈生

於虛卒是道也

郡志 閩書  
丁氏三陵集

道南源委 趙章集

### 備考

陳白沙先生復公書曰來教摘諸聖賢垂世之言  
與僕之事參而辯之大抵愛我深而告我盡也僕  
用是知執事之心一峰明白不欺之心也一峰死僕  
哭之慟以為自今而後不復有如一峰者今乃有執  
事幸甚幸甚執事為說本之經訓與僕所以為學  
所以語人者同歸而殊途但僕前簡失之太略

執事見之太明故疑僕之意異於執事而實不異也執事謂浙人以胡先生不教人習四禮為疑僕因謂禮文雖不可不講然非所急正指四禮言耳非統論禮也禮無所不統有不可須臾離者克己復禮是也若橫渠以禮教人蓋亦由事推之教事事入途輒去使有所據守耳若四禮則行之有時故其說可講而知之學者進德脩業以造於聖人緊要却不在此也程子曰且省外事但明乎善惟進誠心外事與

誠心對言正指文為度數若以其至論之文為度數亦道之形見非可少者但求道者有先後緩急之序故以且省為辭省之言略也謂姑略去不為害耳此蓋為初學未知立心者言之若以外事為外物累已而非此之謂則當絕去豈直省之云乎不規規於往迹以干譽目前僕之此言亦有為而發嘗與胡先生言之矣非諷執事也此不欲形於筆札俟面告執事於僕謂無間者也苟事有未當僕得盡言之豈假諷哉僕才不逮人年二



十七始發憤從吳聘君學其于古聖賢垂訓之書蓋無所不講然未知入處比歸白沙杜門不出專求所以用力之方既無師友指引惟日靠書冊尋之忘寢忘食如是者亦累年而卒未得焉所謂未得謂吾此心與此理未有湊泊脗合處也於是舍彼之繁求吾之約惟在靜坐久之然後見吾此心之體隱然呈露常若有物日用間種種應酬隨吾所欲如馬之御銜勒也體認物理稽諸聖訓各有頭緒來歷如水之有源委也於是渙然自信

曰作聖之功其在茲乎有學於僕者輒教之靜坐蓋以  
吾所經歷粗有實效者告之非務為高虛以誤人也執  
事知我過胡先生而獨不察此僕是以盡之

又

伏讀來諭執事所以進僕者至矣所以教僕者亦至矣  
僕一顓愚人耳凡百無所通曉惟知自守而已曩日至  
京師與諸賢士大夫游日聽其議論天下之事亦頗有  
益惟是愚懵終不能少變以同乎俗是以信己者少疑

已者多也僕之所深與者皆執事同年而獨執事之名  
未聞也奉附到董給事書其中稱道盛德不少置僕私  
心喜甚以為此來當得一見非子仁僕無以知執事然  
以子仁之言又未嘗不追恨於京游之日也承諭有為  
毀僕者有曰自立門戶者是流於禪學者甚者則曰妄  
人率人於偽者凡於數者之詆執事皆不信之以為毀  
人者無所不至自古聖賢未免見毀于人甚矣執事之  
心異於時人之心也僕又安敢與之強辯姑以迹之近

似者為執事陳之孔子教人文行忠信後之學孔氏者  
則曰一為要一者無欲也無欲則靜虛而動直然後聖  
可學而至矣則所謂自立門戶者非此類歟佛氏教人  
曰靜坐吾亦曰靜坐曰惺惺吾亦曰惺惺調息近於數  
息定力有似禪定所謂流于禪學者非此類歟僕在京  
師適當應魁養病之初前此克恭亦以病去二公皆能  
審於進退者也其行止初無與於僕亦非僕所能與也  
不幸其迹偶與之同出京之時又同是以天下之責不

仕者輒涉於僕其責取証於二公而僕自己丑得病五  
六年間自汙時發母氏加老是以不能出門耳則凡責  
僕以不仕者遂不可解所謂妄人率人於偽者又非此  
類歟僕嘗讀程子之書有曰學者當審己何如不可恤  
浮議僕服膺斯言有年矣安敢爭天下之口而浪為憂  
喜耶其晦也不久則其光也不大其誦也不甚則其伸  
也不長物理固亦有然者矣僕或不為此戚戚也且僕  
聞投規於矩雖工師不能使之合雜宮於羽雖師曠不

能使之何則方圓之體不同緩急之聲異也尚何言哉尚何言哉惟執事矜其志而略其迹取之羣咻之中置之多士之列則天下之知僕者無如執事矣幸甚

何鏡山先生撰公家藏手澤序曰泉前輩趙古愚先生瑤成化中以解元登進士自比部郎出為嶺南學憲善以文章卜人貴賤壽夭無不得者其為郎時充會試內簾官得謝文正公文大奇之手批曰狀元拜相必此子也及視學嶺南考校海南士所拔科舉多不足先生意

者曰是姑錄之後來受用終不及諸下劣等亡何科舉  
士過海就大比盡溺水死而下劣等者以不就試無害  
衆人以此二事至今好談先生先生宋室苗裔也其往  
弔宋厓海之濱過奇石碑謁慈元殿址祭大忠祠具有  
文字其過奇石碑詩嚴切惋恨尤膾炙人口人徒以先  
生忠義慈孝人也而今讀先生曾孫大紹所輯手澤編  
則有自歎詩二首以寶鑑喻心大道喻學乃知先生平  
日惕於內省而端於趨向當時海內名流如陳白沙羅

一峰二公皆與往來切磋以求斯道真實之境此則先生所造之精微自知自進而歲月之久著作流落之多泉人亦未有以窺公之全者也是編凡十三首詩居其七文居其六而先生遺筆盡在是矣然皆大紹訪求之四方殘編斷記之中然後乃能得之大紹席門窮巷無旦夕之積自其少年時裹糧重繭絕險以求先生遺文遍請海內縉紳詠歌先生之德行以陳告之當道先生蓋沒百餘年而後綽楔表於里閭鄉賢崇于祠祀今大



紹年七十餘矣朝暮必至先生祠下低回護視其委不  
佞以是編之序凡五年而未得應心不加怒而請愈切  
為人子孫如此不亦克稱先生之後人可以媿夫世之  
無廉恥嗜飲食而忘其先德者哉

按泉南明初諸先正多確守宋儒槩範蔡文莊未  
起時如莊氏恭與趙公其最著者莊公能物色文  
莊於童年取師友於莆中如吳淳夫周翠渠黃未  
軒皆是也趙公則閑道尤謹嘗規切白沙先生虛  
妙之旨白沙欲號海雲公力正之謂其近於禪號  
在粵往來辨難不苟為同近世先正評訂白沙諱  
友如羅一峰胡敬齋羅整菴人皆知之矣獨公姓  
氏稍略細繹白沙復公二書其心許相物色似於

羅胡二公之外不作第二人觀也顧年未滿志著述又復湮沒灰燼無存未得與居業錄因知記並垂考信惜哉吾鄉前輩如丁氏自申張氏冕莊氏履豐何氏鏡山皆汲汲論述蓋以公實任道之器流澤桑梓愜慕無窮也馥恐載籍日杳派別愈難尋緒不禁娓娓詳之附載白沙二書并何公跋語者欲以證公所學所守端的另於同安志錄公大同書院記一首入遺文內亦吉光片羽矣吾鄉鄴架藏書者多如得公文者幸惜鈔錄續入諒有同志曷勝企望乾隆丁丑臘月八日書於繞耕舊學塾家

縣令莊遜菴先生槩學派

按先生為松厓公琛之子松厓趾美先德官終廣西

按察司僉事以仁恕清靖著聞故先生仕跡亦以清白世其家其源流遠有端緒郡志稱其蒞官有風槩未曾立傳今考之文莊蔡虛齋贈送序言稱先生學博志高到官貧約如故所養益不凡其表揚師門之節固信而可徵也茲特錄其派系附文莊一人著於篇端

縣令莊遜菴先生槩

莊槩字世平晉江人宋少師藻齋公之後父松厓公琛

廣西僉事聚成化間歲貢尹廣西陸川以考績改任  
江西信豐縣虛齋蔡文莊公送先生尹信豐序稱受  
業師遜菴莊先生家素貧用素約不獨未仕時為然  
前此尹陸川六年而貧約如故吾先生之所以為人  
者可知又曰先生博學高志少年聲光馳八閩閱世  
益深抱負益壯所養益不凡其所施為不以官之崇  
卑地之廣狹限者閩書載其知信豐縣有節概云

蔡文

莊文集

廊志歲貢

成化以後諸先生學派

泉自成化後風氣淳龐人物挺生一時經學之茂海  
內宗之如虛齋蔡先生紫峰陳先生次崕林先生淨  
峰張先生後先倡明正學風傳響應興起者多外此  
若莊公恭林公啟傳公凱李公雍郭公克一亦皆師  
傳友授綽有典型至黃公河清諸賢多講切問學追  
慕前修不苟以世儒自命者其餘豐功碩德未能遍  
錄特舉其師友可溯者載于編

副使莊拙齋先生恭

莊恭字儀甫號拙齋晉江人為諸生時從莆吳淳夫仲  
珠學而與黃未軒仲昭友成化五年登進士第授刑部  
主事給事中韓文等以論兩宮事被拷訊恭首疏廷救  
之陞員外郎出為江西按察僉事風采颺發雷擊斧斷  
行部南安上猶令望風解去入與試事得豐城楊廉於  
落卷拔擢之成化丁未顛寇大哄禍延閩楚粵三省朝  
議知恭負文武才陞為本司兵備副使踰月巨魁授首

建昌瑞州寇復作勢張甚恭出奇殲之前後俘馘無筭  
餘悉平定安輯捷聞璽書嘉勞賜金幣寶鈔南城張昇  
廣昌何喬新為鄉邦計咸請即本土起擢為藩使或觀察  
使會丁祖母憂歸卒恭孝友無間先貲悉讓諸弟俸餘  
則推贍戚族善物色後進獎掖不倦識蔡文莊於童年  
期以大儒見李文祥指為年家錚錚所交遊來往惟周  
翠渠瑛張東海弼雍康僖泰數人當憲宗時閭王直幻  
術李孜省最用事而孜省江右人也屢欲得恭為重恭

絕不與通年位不滿世人惜之孫如愚新興令啓愚聲

慶府教授並有聲

閱書

清源文獻

監丞林海峰先生啓

林啓字仰之同安人魁梧軒奕成化二十二年鄉薦第一與蔡文莊相次發解並以易學倡於鄉泉人興易學以盛二門門生也文莊易猶在泉啓為安陸州學正安陸之易啓發之也倣胡安定法為教人士循軌諸生餽贈無所受而周其貧者遷國子監博士及門如趨林貞



肅俊嘗錄啓之名於方石祭酒謂然居二年遷南京國子監監丞楊吏部攝祭酒當詣京或請他攝楊曰仰之在須他攝何為六舍生羣請之吏部為宜遂攝祭酒卒于官囊無一金六館書生爭致襚林貞肅以所自預深衣方履殮之為撰墓志曰仰之介而容方而不腐為文章有奇氣又曰予重得士既晚得仰之謂銘仰之耶嘉靖中有孫曰天德者以貢歷廉州推官路南知州廉人祀之名宦其元孫一柱萬曆庚戌進士歷官參政見李

表一學派

閩書

張氏雒閩源流

林貞肅撰墓志

教諭莊翠峰先生鵬

莊鵬字萬里翠峰其號惠安人成化丙午鄉薦就選授  
新寧教諭議經術考古製器端文字程式以變易學者  
習尚學者始知所嚮方福州劉御史遜以言事出知武  
崗州復為藩府所擠人多斂跡鵬獨與往來會有中以  
飛謗者遂解職事歸獨肆力學問延接後進處鄉里是  
是非非不苟淨峰張公撰墓志云某生晚不及先生壯時

也獨記頃年屢以通家子謁拜先生一室雅靚圖書筆  
硯之外無他物先生終日整襟端坐點勘書史雖分註  
小字亦精細不苟是時年幾六十矣與人言縱橫穿貫  
舉古今理亂事理物情之變能使聽者竦然至聞人有  
善與義當勇為者必咨嗟稱賞惟恐人不及知其好學  
樂善如此

舉人鄭先生賢

鄭賢晉江人成化丙午舉人以易經授徒其年同登鄉

榜者五十二人皆其弟子曾答莆陽陳侍御書曰承教以益壯益堅相策弟不鄙敬佩繹之年有老壯學無作輟夫子有假我數年之思而漢霸抱朝聞以為願則一義未解一理未信有非可以中道廢者不鄙治易幸附驥尾竊計猶在強仕之年豈以春闈弗售而遽餒耶君子不患名之不成而患志之不樹吾儒許多問業許多工夫尋向上去探討古聖源頭窮年邁韶不進不休則益壯之箴信可銘心其於益堅所詔則古人處一之說

也遇不遇貞於時堅不堅由之已脩已俟時有可挫不可使餒者兄視不鄙豈靡靡諱窮之夫哉若小挫而靡則所謂不愧科名者何人不愧聖賢者又何人而甘自汨沒之耶近日朋友來訪者時以義經相問難自愧麤心浮氣不能闡揚四聖奧義謂宜當討論理會使心即易易傳心而後可若夫名利一場未嘗掛諸念頭非直不以窮為恤且狂慙不知有窮者故夫益壯益堅道理雖未之逮然鄙心竊意其當如是耳茲因教音之及請

益砥礪之以不負兄教

清源文獻

司訓洪汝言先生昌

洪昌字汝言南安人幼失怙鞠成于母攻禮經成化十二年歲貢授常州司訓經學純正議論高古嘉意作人月有課歲有會士子翕然宗之尤長於詩文善草書時流咸推重焉

通政黃蓮峰先生河清

黃河清字應期南安人弘治十五年舉進士授吏部文

選司主事歷郎中慨然以進退人才自任凡所舉錯甚稱冢宰楊文襄公一清意首薦劉大夏韓文林瀚熊繡王宗彝朱欽艾璞陳壽王質萬鏜程文程溫艾洪徐昂葛嵩張良弼呂种潘鏜劉演蕭乾元黃昭道張瑋邢珣樊禹朱廷聲等二十五人又薦恬退之士四人曰潘甫盧格張詡祝萃以風天下又若董玘萬鏜楊果聞淵姚繼嵩夏良勝章拯唐龍周廣顧珀皆其所舉士論翕然歸之稱典選得人者前有黃天台後有黃清源天台者

黃孔昭清源則河清也擢太常少卿提督四夷館一日  
羣立于朝有一巨璫來羣揖中惟不識河清或以姓名  
示之璫駭曰是彼是彼明日持雙幣詣謁河清瞰其亡  
往返焉丁父憂歸嘉靖初年遷南京通政卒于官所著  
有蓮峰稿河清好讀書遍交當世士與蔡虛齋王陽明  
湛甘泉董中峰何大復鄭少谷諸公相善而於三衢棠  
陵方豪尤契豪稱其嗜學如炙悅士如姝其氣充充其  
心休休動履必則古稱先陳氏道基序公文集曰蓮峰



先生妙齡舉進士陟華要志槩不羣尤善著作閩小泉林公嘗賞其初稿而序之莆省吾林公攜刻于粵以傳焉愚嘗受而讀之仰思國家更造文章著作至於弘治滋益精醇猶之淑氣渾噩品彙涵濡乎其間莫之遺也先生於其時以少年遭際內承家學外友天下豪俊同時若蔡虛齋王陽明諸公咸以經術著作有聞於世先生與之往復議論道契志孚故其所得益深與諸老並稱為一時之盛三衢方公固以文名家者而推崇先生

謂所為文動以先秦為則斯非漫語云第淑清淥清閩書

清源文獻

黃先生淑清

黃淑清河清第也自號曉江漁者為諸生棄之去入山耕讀邦君賢大夫禮之不應也令顏容端與善以艱歸與之書曰俗以仕宦丁艱曰放假蓋謂歷官日多不能肆縱只一居喪當為暇日利田便舍肥肉大酒言出莫違意逐羣應入耳驗目大都如此昔呂東萊在艱講授

陸象山已識其非何今古相遠不啻雲泥執事學有主  
腦定是踏定一步也

黃應萃先生濼清

黃濼清字應萃別號東水兩應鄉試不偶益勵志弗衰  
事嫡母溫清奉養至老彌篤莊事諸伯兄日以經學相  
質無何嫡母沒率先諸姪治宅窆既襄事廬墓側者三  
年過者莫不曰此孝子讀書處也濼清念生母葛氏於  
父卒後早出不獲供甘旨輒陟屺而號既而嘆曰古人

有捐二千石間闕徒跣必觀所生而後即安我獨非人  
哉遂匍匐之道寢食俱廢後訪得之某里遂為母子如  
初人比之雍州云濃清嘗謂古之學者由源而派後之  
學者逐派忘源古之文如大冶肖形後之文如掌中花  
耳因證小序窮韓申之業而一稟之考亭為韻說十餘  
卷已復考班馬異同旁及唐宋諸乘為歷代史評百餘  
卷時而晝有得夜有書輒起而識之為觀書目錄十餘  
卷其為文多準東西二京諸所應舉陳言輒嚼蠟眊之

耳手持一卷撫二子而歌令二子和之復于于嘯曰  
若視吾所獲與千畝孰多二子有樂登賢書有及為  
諸貢籍首涿清猶布衣蓬戶日囊故時書讀之琅然  
性故方不妄色笑與人語斷斷侃侃然非公正不發憤  
至其雅度汪涵飲人以和遇不可意貌不加遽詞不加  
激門閑諸後進執經問難各片言立剖去今是邦者  
爭嚴重之蘇氏濬曰憶余初侍先生乍而望之機發  
於踵久而即之冲乎若不盈也殆所稱博學篤行君

子耶

蘇紫溪先生集

黃先生希顏

黃希顏晉江人潤之父其事實未詳按何氏清源文獻  
曾登其姓名茲錄之其著理氣說曰孔子曰太極生陰  
陽邵子曰道生天地是理生乎氣之說也朱晦翁曰有  
此理而後有此氣蔡季通曰理先而氣後是理先乎氣  
之說也世之學者往往多以此為疑惟恐有理氣之分  
判為二物耳殊不知理勝乎氣氣載乎理雖不相離而

亦不相雜也善乎孔子之論道必以形而上下言之則理氣之辨明矣蓋理虛也氣實也虛者常存而實者迭有也是以天地未判之初陰陽未生之始必有理以主宰之然後動靜有所分清濁有所別不然則成一氣塊耳何以爲造化之機生物之本哉然而伏羲之作易兩儀之上未嘗言太極也至孔子始言之仲尼之贊易太極之上未嘗言無極也至周子始言之此皆人世之所駭而聖賢之不得已也何者弗烈其聲而聾者弗聞也

不燭其形而昧者弗睹也如孔子不言太極則以氣為  
理者多矣周子不言無極則以道為氣者衆矣故聖賢  
不得已而後有是言也是豈好為奇恠之論也哉愚謂  
太極一圖不出伏羲範圍之外其曰太極動而生陽靜  
而生陰即伏羲初畫之兩儀也其曰陽變陰合而生水  
火木金土即伏羲次畫之四象也其曰乾道成男坤道  
成女即三畫之八卦也其曰萬物化生即因重之六爻  
也夫豈有二致哉蓋天地造化之具不過陰陽五行而



已而萬物生成之理不過氣化形化而已是以伏羲之  
畫卦必始於三畫而終於六畫也傳曰剛柔相摩八卦  
相盪此之謂與若夫邵子一每生二之說亦以見畫卦  
自然之妙而變化之無窮耳是豈伏羲之本旨哉愚敢著  
是說以祛世人之惑觀者恕其狂妄之罪則幸甚矣  
清源

文獻

參政黃以誠先生潤

黃潤字以誠晉江人正德十六年進士授武進令值江

南大饑流移數萬賑活有方邑賦重前巡撫周忱奏折布以輕之疋布抵糧一石吳廷舉議徵價疋銀五錢潤曰折布固將輕之若定五錢是重之也乃改徵三錢擢南刑部主事改兵部武選奏立選法遷車駕郎中出守松江丁外艱去松人舉前兩賢守以配潤作三清堂祀之服闋補東昌守陞河南副使備兵信陽時章華臺等處劇盜盤踞流劫潤討平之擢山西左參政念母老乞終養歸先是潤在吏部冢宰欲以科道官潤使李默喻

意固辭默曰有吏部郎登門送官而人不受者耶潤曰  
有吏部郎登門送人官者耶因大笑而去同年張孚敬  
用事時不一見及三去國三送之張欲處以文選堅謝  
如前張淨峰岳嘗稱潤當於古人中求之曾與書曰僻  
居無朋友之助幾成惰棄想令眉宇每切夢寐官曹清  
暇日月新功必有可以見教者便中千萬不惜大抵吾  
輩年紀漸老大精力亦無多切在於要緊處用工如讀  
書專治一經打成片段儘有受用向在南宮讀易已有

次第後來能不間斷否此如日用飲食頃刻不可放下  
今人苦苦要去學詩學字學文章聲口真所謂浪費精  
神可嘆也潤家東石時有東崖西郭之號西郭者同時  
同邑清節御史陳蕙也著有東石漫藁十卷經濟備考  
四十卷


泉郡志

張爭峰集

教諭郭約之先生克一

郭克一字約之惠安人正德八年鄉薦少從莆陳茂烈  
學嘉靖中署歸善教諭捐俸新學舍復分齋肄業之規

申飭條教講說經旨士心疎異 閩書



閩中理學淵源考卷五十八